

四庫全書

集部

欽定四庫全書

少室山房集卷十二

明 胡應麟 撰

五言古詩四十七首

入新都訪汪司馬伯玉八首

有序

余以癸未之秋識司馬汪公于武林片語定
交誼逾傾蓋於時公即訂余把臂黃山白岳
間旋以病冗侵尋匍匐風塵滯淫湯藥奄忽

十禩竟爽成言客歲之春公至嚴陵復申前
約期余仲秋入新安行有日矣會聞王長公
病亟踉蹌走弇山園一問之後取餘杭陸道
入歙而長公晨夕挽留余亦惓惓瀕發復止
卧公故所居來玉樓中再閱月長公竟爾傾
逝余抵舍則歲行盡矣今春鄉人至自函中
傳公將入弇山拉余同發爰特買舟西上
謁公太函修社白榆之末因追隨杖履偕過

婁江念宇宙間遞主文柄惟公二人而余皆
濫叨國士存亡倏異感愴何言孤航逆流中
夜不寐撫今追昔成賦八章稍次後先亡論
工拙知公讀之感愴有大于不佞也

芳時忽不樂悵然思美人美人天都上宮闕何嶙峋手
把瑤華草遠寄越江濱念念欲往從之弱水不可親愧無
晨風翼寤寐寐懷苦辛

軒車何皇皇東下武林驛冠蓋羅長衢嘉賓四面集伊

余實駕蹇喟馬傷伏櫪一顧天閑空高座傾四席眷眷
忘年交惓惓在茲夕

歡言奉尊酒既登君子堂不惜羅衣襦為君充下裳寧
辭入宮妬亭亭理紅粧常恐朝露晞歡愛不能長中宵
起房室引領情內傷

我我弇山堂美人在其下脂車婁江渚聊用息余駕
爛雙飛龍連城詎論價咨嗟良宴會朋舊半凋謝三星
爛河漢鈞天在廣廈

懼日苦不足愁日苦有餘談笑未及終執手河山如蕪
葭阻長道渺邈天一隅殷憂見華髮歲暮空踟躕焉得
搏風翮送我來枌榆

百年迅朝霜奄忽越與楚鬱鬱瑯琊墳瞬息已千古河
清邈難俟中夜頻起舞歧路安足論睽離熱肺腑明發
戒沙棠維梢潑江浦

西上新安江危灘峻浮雲太函何巍巍迥與上界鄰蒼
龍守重關鵠鵠日為羣美人坐金堂一笑情內親悲來

話親故氣結不能陳

往事去莫追來懽倘可續金石誠匪堅富貴馬所欲平
原十日飲歲月苦不足肯酒羅高堂新聲動絲肉令名
敝天壤何事傷局促

別司馬汪公八首

有鳥巢天都自名為鳳凰文章被六翮五色何輝煌飲
啄梧桐枝矯翼臨朝陽一鳴舉世驚清音雜琳瑯云是
王者瑞千仞方高翔

高翔欲何為浮雲渺天末言欲攬德輝翩翩下閭闔東
海有鵷雛孤鳴蔽林樾羽翼苦未長天路迫難涉延頸
望霄漢邈若秦與越

丈夫重意氣焉論越與秦千里行相求岡陵若雲屯輕
舟涉廣漢夾岼垂芳蓀巨石何崔嵬日夜飛流奔天都
在咫尺舉頭見龍門

龍門造中天片刺亦何有清風惠然來長揖把余手肝
膽儼欲披豐庖出旨酒廣樂羅前庭釣天在戶牖一別

已九春相顧驚老醜

老醜詎足嗟百年迅飛霞念彼弇山堂緬邈天一涯佳
人逝安適相望徒蕙葭悵馬念長別中腸結如麻今我
不為樂日月忽已遐

行樂當及時百歲難為期鉛華若流水日夜東南馳夜
長日苦短秉燭遊芳池明月出西園衆星何陸離顧視
兩天孫冉冉雲中嬉

嬉遊亦何常高談蔚霞爛絲竹羅前庭新聲一何艷娥

娥紅粉粧妖姬列如粲登彼幔亭峰酣飲日方晏詰朝
泛浮槎遙遙上河漢

河漢杳無極仙槎逝難留明發還舊疆何以寫我愁依
依丈人行傾蓋為九州天都望威鳳八翼凌空遊誓將
振弱羽歲歲行相求

東陽李茂才允達以古風六章雜詩一卷見投
斗酒定交留連浹夕答贈四首

首夏維清和朱光何熒熒衆木紛扶疎朝陽翳林薄鳥

雀羅前庭飛鳴自相樂伊余懷一丘索居卧層閣誦彼
伐木章喟焉傷寂寞

寂寞不可居起坐彈鳴琴清風穆然至之子貽好音自
言長東郭夙昔懷同衾丈夫重意氣焉論尺與尋飄然
命余駕信宿來蘭陰

蘭陰屹宮堯雙溪紆且鬱蓬蒿蔽行徑倒屣為君出中
廚呼斗酒申盟指金石願為雙飛龍霄漢長比翼良哉
如澠燕生平在今夕

今夕復何夕燕婉難具陳三星爛東壁皎月懸高旻朱
絃從風發四坐回陽春但言戒明德努力希良辰千秋
樹大業皓首以為鄰

寄李惟寅歐楨伯四首

迢迢牽牛星乃在河漢旁織女處其東脉脉徒相望鴛
鴦失羽翼烏鵲難為梁采采芙蓉花道遠不得將

遠道亦何思美人在京洛白日麗中天流雲飄阿閣煌
煌五侯宅冠帶日相索寧知甕牖士終歲長寂寞

寂寞寧復陳嗟此明盛年矯矯黃鵠姿孤飛鍛其翰山
川鬱以紆道路長苦難顧視雙游龍嘆息浮雲端

浮雲不終朝歲月忽復易豈伊岩廊慕大業在金石緬
懷同心侶沈思無終極安得西飛鴻假我雙羽翼

寄邦相四首

涼風倏以厲日短夜苦長大火西南流蟋蟀鳴我牀徘徊
起中夜攬衣不及裳念彼同懷友投袂忽如傷

弱冠京華遊衣冠九衢列鞍馬如浮雲與子獨相狎灼

灼桃李花光華自怡悅飛沈一朝異忽若吳與越
與子別三載中懷日熬煎豈不念同心悵彼河與山趙
壁有時合隋珠有時遷安得晨風翼送我置子前
心悲亦何為各願加餐飯子游青雲途予守藜藿賤百
代同音徽何論異鄉縣黃髮會有期茲盟庶當踐

送朱水部可大入都四首

蒼龍守阿閣赤驥鳴天閑彼美承家子被服都且妍飛
飛振六翮遊戲青雲端出入承明廬行者夾道觀朱絃

順風揚四坐靡不歡

矯矯孤飛鴻明時策高步亮節難為容浮雲起中路層
陰蔽白日圓景忽將暮轉蓬隨長風行行踐霜露驅車
大河涘瀍洛莽迴互

王屋一何高嶽岑蔽層雲登高望宛洛車馬如游塵萬
象列毫端抽思戾高旻仙人王子喬轉盼迹已陳三花
滿懷袖寄我忽若新

百里詎足棲長途復當踐帝優循良吏召對明光殿羌

子與我親綈袍長戀戀雙鳬一朝去臨風涕沾面努力
崇千秋慰此金石願

別汪仲淹二首

仲淹病卧三載矣茲以余之抵新都也為我
一至桃溪再至岩市三至太函聞余告歸意
殊戀戀別之古詩二章

噉噉雲間雁飛鳴各有適翩翩水中鳬中道乖羽翼我
當還故棲子病卧蓬室明發從此辭遙遙望鄉國東顧

臨大江波濤無終極

大江豈不遐一葦朝可航我友一為別倏若逾三霜跼
蹐念子病送我濠之梁遲遲白日暮車馬為傍徨人命
匪金石睽離熱中腸長當保玉體百歲遙相望

娟娟苧蘿女二首寄李生時秋試罷歸

娟娟苧蘿女艷色明朝霞珊瑚被玉體瓔珞相交加綺
疏傍阿閣高居臨狹斜朝披越臺錦夕浣吳門紗一為
白雪言清音浩無涯哀思激雲漢行路咸咨嗟寧知中

腸怨愁結紛如麻芳春倏已盡白露溥蕪葭

娟娟苧蘿女婉婉矜弱步浣紗越溪上西施屢迴顧羅
襪揚輕塵徘徊感行路但持雙明璫贈君比紉素灼灼
桃李華嘗恐瘁霜露羞為倚門笑寧為入宮妬亭亭處
空閨冉冉白日暮

己卯仲秋復當計偕北上以家母病不赴與諸
友言別四首

荏苒歲時邁蟪蛄鳴前庭大火倏西流白露中夜零公

車有程期僕夫戒我行州郡忝招邀閭里相送迎肅肅
同袍侶命駕來林垆各言休明世努力事遐征夕當辭
室家明當赴神京

神京豈不遙閭闔造中天金莖夾廣陌玉陛蒐羣賢幸
生唐虞代況逢強盛年徘徊高堂病一卧垂十年既無
稚子娛亦寡羣從援椿庭渺何許萬里越南滇感此去
住懷戚戚摧心顏

戚戚徒爾為興文各踟躕夙昔慕巢由散髮箕潁隅矧

茲烏鳥情能不懷倚閭令伯惟承懽王陽實迴車亦知
軒蓋榮方寸寡所愉願言青雲客矯翼升天衢君子遊
岩廊小人安敝廬

敝廬亦何有有稼復有萱旭日麗遙岑清風濯林園問
寢趣庭幃進膳列芳鮮雖無黻冕貴彩服歡慈顏板輿
歷高臺絲竹羅長筵跼蹐禽鳥聲映蔭林木繁俯仰中
所欲百歲聊自全

寓懷三韻七首

泛泛海上鷗機忘意自適嗟嗟塞翁馬何失亦何得七
日混沌死哀哉倏與忽

膏以明自煎香以熏自燔葆光如其和乃可全天年巍
巍廣成公千歲空同顛


西方大聖人國土名極樂萬法同虛空一塵安所著嗟
嗟蠻觸民智勇困蝸角

向長志五岳宗炳卧一丘濟勝苟無具澄懷亦天游鳴
琴一室內萬象同蜉蝣

飛蛾赴明燭徇利忘其身蒼蠅集鼻端高峻為禍因石
戶有遺民古今稱達人

齊王本好瑟東郭仍濫竽與世苦枘鑿獨處恒嗟吁九
州不足居何況五畝廬

世人競巧知逐逐如飛蠅井蛙亦詫海夏蟲曷語冰俟
彼千秋人陳迹異代論



少室山房集卷十二

欽定四庫全書

集部

少室山房集卷十三至九

詳校官編修臣 魏

侍讀臣 孫球覆勘

總校官庶吉士 臣 何思鈞

校對官中書 臣 王鍾泰

謄錄監生 臣 閻學朱

欽定四庫全書

少室山房集卷十三

明 胡應麟 撰

五言古詩二十七首

秋日偕諸同志遊金華二首

屈子歌遠遊尚平有遐慕
顧謝青雲人言尋赤松路
歷覽窮幽深冥探愜情素
磴壑捫欽岑林巒陟迴互
崖傾黃葉積谷轉垂蘿護
高峰散餘靄峭壁屯寒霧
娟娟初

月昇隱隱微陽暮長謠欽昔蹤獨往懷蹇步慮由忘物
超道以遺榮悟迹契容成公神交子支父徘徊北山文
惻愴淮南賦睠彼丘中人迴鑣對岩戶

成羊閔昔蹤化鶴神遺迹曰余蹇劣姿緬企靈仙窟時
維仲秋暮春糧負瓢笠落葉紛前林淒霜被長隰躡履
行翠微捫蘿上層壁岩巒莽迴互雲霞屢興沒蒼蒼猿
鼯啼濯濯麇麇集乍聞帝鴻鳴今見初平石芝田翳宿
莽玉竈埋金液羽駕何飄遙人寰信超忽胡為七尺軀

甘此百年後去去從吾初城東有黃石

仲夏至自京師作

人生如飛蓬倏忽異鄉縣僕夫趣我遊肅駕向畿甸朝
登太行嶺暮宿黃河岸荏苒踰修途遲迴陟層巘中林
絕煙火塵沙蔽顏面浮雲翳荒壘咫尺行莫辨遙遙至
幽并四顧見閭閻中天帝王宅飛甍翼樓殿空懷稷契
志未遂夔龍願辭非上林侈賦豈河東擅長嘯起拂衣
歸來弄柔翰寄言達生者驕人有貧賤

秋日攜尊城東大寺山作

步出東郭門，騁望西山麓。
信足登其顛，聊怡白雲目。
川原何逶迤，城邑自相屬。
飛甍儼鱗次，萬戶列平陸。
高峰下牛羊，斜照散麋鹿。
蒼蒼漈川流，靡靡蘭皋綠。
列岫澄塵襟，清漣媚遐矚。
契深浩忘言，慮澹信超俗。
載詠衡門詩，軒蓋非所欲。

九日喻邦相邀司馬汪公泊諸君登高天竺屬
余尚留檣李不及會以遍插茱萸少一人插

字為韻

霜露維深秋木葉殆盡脫紛披時菊繁憔悴蘭芳歇上
客懷登高羣公欣令節薄暮迴輕橈凌晨戒車轍窈窕
度城闌逶迤陟岩穴遐覽窮八荒輕舉渺六合三竺凌
層霄雙峰表天闕綠野名園開朱宮梵筵列白雲冒岡
巒丹霞冠林樾淅淅涼風生隱隱微陽滅修鱗競容與
平湖亦澄澈感此歲序更羽觴共怡悅妙管激清商流
音迴白雪解珮俱朝賢銜卮並時哲言念同袍子鴻飛

渺天末醉把茱萸枝徘徊不能插

與衆賓遊城西園亭作二首

端居俟時命日暮寡所懽眷言寫憂思散步遊西園西
園一何麗薜荔交崇垣飛甍帶層閣曲榭臨迴軒丹霞
吐岩岫白雲冠林巒灼灼芙蓉披瀼瀼白露溥遊魚躍
清波好鳥鳴樹端感茲動植情悟彼節候遷百年亦瞬
息金石疇能堅念當命我友肅駕開華筵悠然遲心賞
寓目雙飛翰

嘉賓既咸集徒御何輝煌逶迤度飛觀置酒臨迴塘長
渠激芳流曲岸披叢篁齊瑟列前楹秦箏鳴後堂燕姬
發皓齒越女呈紅粧清音振林木妙舞協宮商觥籌互
交錯四座咸慨慷夜闌更秉燭雕輦隨風翔明月出雲
間列宿正縱橫四序忽若馳行樂安可長申章紀良晤
無為歌太康

卧遊室午睡起題

東方談十洲尚子懷五岳玄覽豈不遐浮踪竟安泊伊

余實寒劣稟賦孱且弱遲迴三十年強半客京洛風沙
蔽顏面神明日凋落雖竊文苑聲未覩寰中樂竭來卧
一丘晨昏課耕鑿卜居鄰莽蒼築室事恬漠軒窗不盈
丈周遭藝蘭若游目惟圖書怡神匪丹腹時援白雪琴
三弄對猿鶴泠泠衆山響一一度林薄五鼎非我榮萬
鍾亦奚樂達哉宗炳言先民有遺籙

將負瓢笠入金華從赤松三子遊作

有序載別卷中

三十六洞天金華亦奇絕古昔羣真棲雲霞閭闔闔赤

松乘紫煙皇氏憩丹穴緬邈懷仙靈栖遲表才傑奕奕
孝標生漂流寄東越長生本經世不朽惟大業伊余後
千載東髮慕賢達逝將辭垢氛尋幽入林樾大藥倘可
逢雄詞冀頽頽異日騎雙龍攜手輕六合

題陸信卿書屋二首

五岳豈不遐一丘良自適言從谷口居永憩隆中膝結
搆凌層霄飛軒控奇石嶽岑帶林巒窈窕羅原隰輕颺
迴座隅明霞護檐隙之子何逍遙鳴琴坐幽寂列岫披

琅函遙峰映絳帙攬挈萬古心俯仰千秋迹白馬窮妙
詮青牛探真籍神遊羲禹庭冥棲素王室伊余麋鹿蹤
羨爾煙霞癖殷勤勞夢思惻愴務晨夕何當辭世紛相
對捫蘿薜散髮繡金書長歌抱瓊笈一笑塵氛空揮手
凌八極

大鵬搏九萬尺鷲翔榆枋遠近各有適逍遙固其常伊
人勵高躅卜築鄰山崗四壁羅琬琰五車插琳琅冥搜
極浩渺幽探窮微芒棲心丈室間寄情八表傍丹霞入

我牖白雲為我裳
馭風學鄭圃棄瓢懷潁陽
豈同渭川釣恥為吳市藏
一區足吟嘯萬卷聊徜徉
樂哉帷中子
歲年良可忘

仲秋十四夜同諸子攜觴登一覽亭玩月作

秋高桂華滿夜靜蘭膏歇
素影流長空寒光浸天闕
孤城白露下萬戶涼飈發
置酒臨高臺長歌對佳節
憶別蓬萊宮回首三千劫
蹉跎落風塵往再見華髮
舉杯屬嫦娥乞我長生訣
乘雲朝太清飛步還紫闥
自按霓裳

操重翻羽衣闌愧彼塵世人徘徊望圓缺

十五夜對月獨酌有懷燕中諸君

佳期三五臨遙望挂圓壁皓魄揚清輝亭亭墮檐隙攬
衣步前庭感此長嘆息憶昔京華遊文儒盛東壁中宵
薊門燕五夜甘泉集蒼龍玉繩挂露掌金波溢惜哉道
路分佳人遂南北寤寐安可憑瑤華詎能即欲從萬里
天持贈嬋娟色願言逐飛鴻隨風起雙翮

登鹿田

日暮捫女蘿亭亭出危磴萬壑來松風飛雲墮樵徑行
窺虎豹穴側並猿猱進及登衆山顛始覺天宇峻曾聞
赤松子茲域開靈勝丹砂信有術塵慮了可竟傷哉緱
山鶴不返瑤池駿惆悵仍獨歌青霄落寒磬

家君北上半載不得問述懷

朝日照高臺清風被華池椿庭萬里外北望浮雲飛豈
不念行役相攜赴皇畿眷言高堂病藥石久告疲仰無
令昆託俯靡弱弟依以茲謝形役息意掩荆扉朝掇南

澗藻夕采西山薇
緬懷彈冠客惻惻常抱饑
天門九重闢王路
正逶迤軒車滿京洛
鞍馬如雲馳窮年
叫閭闔當道饒狐狸
積薪諒難守歲暮空流離
側身起長望涕淚沾裳衣

寄懷司馬汪公

公與余期是歲遊金華台雁諸山

天游表龍德水擊知鵬搏
矯矯司馬公偉度周八埏
先驅既左馬緩步亦揚班
伊余慕匠哲邂逅自臨安
千秋默相許片諾永不寒
追隨武林驛揮袂弇山園
黯黯臨

別懷欲吐不得宣殷勤戒茲歲澌水仍周旋天台訪大
藥雁宕窮靈源春和屈炎夏寤寐來華軒願當脫羈
一杖攜名山雄章闢混沌片碣三千年

聞大司空朱公訃志哀十二韻

匡廬摧大江天柱折南岳涕淚盈九原伊人豈重作桓
桓大司空東髮仕臺閣小心厯四朝姬旦恒惕若維昔
嘉隆歲河流泛大壑臨軒萬乘送飛馭百靈愕八荒就
疆理四海安畫諾晚遂尊鱸興高蹈游廣莫裴公係安

危司馬耽獨樂方勤大廷詔忽跨遼東鶴衣裳躡其尾
名姓懸海岳煌煌億萬載禹功在河洛

祝貞婦詩

有序

貞婦邑茂才祝獬妻也二十夫喪矢志弗二
撫其遺孤勗以成立迄今年七十矣厥孤大
猷既東走長洲乞御史大夫陳公傳復日夜
叩余門頓首庭下曰先生幸惠一言則母氏
永以不朽余悲其意援筆為賦茲篇

結髮奉君子，懽愛兩不疑。如何高堂上，一旦生別離。驚
颺蕩白日，去我忽若遺。重泉逝將會，念此黃口兒。皎皎
匪石心，柏舟以自持。績紵度晨昏，卒歲恒抱饑。總帷下
重關，荆棘盈柴扉。冬半多烈風，僚慄中我肌。顧瞻雙鴛
鴦，比翼東南飛。豈無賢雄匹，再適匪所宜。亮為南山松，
安受雪霰欺。願當畢餘命，不媿死者知。我聞再嘆息，三
嘆懷令儀。抽毫賦黃鵠，萬古欽蛾眉。

二酉園為陳玉叔京兆題

不佞藏書室黎惟敬題曰二酉山房而玉叔
京兆闢園亦曰二酉命余賦詩

吾家二酉齋斗室不盈掬何以稱茲名架上書萬軸公
家二酉園大廈蔽陵谷何以稱茲名筆底珠萬斛樓臺
瞰空起雲霧傍檐宿雕甍挾天柱高棟擎岳麓軒窻洞
庭葉戶牖雲夢竹蜃鰐遊長川虎兕嘯平陸岸芷紛葳
蕤汀蘭互芳馥主人湖海豪瀟灑脫塵俗開襟跨寥廓
解帶謝拘束三閭問靈均九辯追宋玉名驚孟公座夢

啓傳岩卜誓掃六合塵一榻非所欲蜚聲京兆里張趙
三鼎足至尊催賜金上相待橫玉異日休林泉賜第鏡
湖曲華堂坐晝錦飽看四野綠煌煌中令墅烺烺魏公
築寧當卧二酉卒歲事畊讀好借胡生居日饜蠹魚腹
攜手崙崑丘相將問周穆

大隱園為陳司理題

大隱園者陳司理立甫讀書處也在沔陽城
東名流題咏甚富書來以五言古屬余

衡陽七十峰洞庭八百里
脩然五畝宅結構傍江汜
仄逕穿藤蘿層軒莢桃李
白雲何英英丹霞亦靡靡
空翠流重檐林嵐潤湘几
主人金閨彥夙昔厭紉綺
名家孟公後俠氣元龍侶
高言和陽春清響激流徵
縱橫彩毫落烺烺雋聲起
朝辭薊門燕夕佐越臺理
騷驥遊天閑鸞鳳出榛枳
一丘寧獨樂十載曠棲止
緬懷東方生大隱帝鄉邇
聊用名吾園歸夢時徙倚
伊余東海民蚤歲羣鹿豕
孤悰託松桂幽夢結蘭芷
側聞輞川勝佳興浩

難已冉冉攜芳尊悠悠負綠綺攜我初平石適君仲長里青鞋與布襪行邁自茲始

心遠堂為陳立父題

心遠堂在大隱園之內堂前後有栩栩齋萬綠軒等處堂則總會一園之勝者也

陶公住人境心遠地自偏陳侯服官政結廬詎同然吾聞魯仲尼行止非一端寸心若太虛龍蠖偕蜩妍華堂構空起正對衡岳顛洞庭八百里日夜浮朱欄鯨鯢跋

高浪蜃鰐遊驚湍祝融及天柱雲密紛鈎連迴雁遏層
霄石廩屯飛烟奇峰七十二一一羅堂前彼美堂中客
妙齡夙忘筌冰壺瑩塵表玉笈開瑯函攜賓坐堂上四
面羅蒼斡鳴琴憩深樹看奕垂疎簾目送雙飛鴻迢迢
極雲天心遠室從邇悠悠浩忘言興文念朋好一訂柴
桑緣殷勤沔陽約尺素馳江干吾將負瓢笠卜築鄰青
山異時陳蕃榻倘為孺子戀

送李子赴試錢塘

大梁本任俠壁立逾千尋一過昌穀生握手為斷金中
臺振高步十載囊瑤琴中途邁君采邈焉奏遐音聲諧
響必赴異代猶沈吟矧茲百里壤而不懷同心緬余起
末學努力搢詞林遐思太古上時俗非所欽栖栖卧一
壑委懷甘陸沈李生一何憊物色來蘭陰雙溪入馳溯
三洞迴登臨清言吐肝肺古色流衣襟吾寧負奇癖爾
亦饒書淫揚亭共寂寞原巷偕蕭森子迹尚霄漢余蹤
久蹄涔他時樹大業盟言倘在今

七夕

昔余遊天門白榆正飄飄濯足銀河水驚飛烏鵲橋牽
牛與織女欲渡愁無聊相將忤上帝譴謫離青霄騎鯨
向東海龍伯頻招邀舉足屈五山投竿連六鰲狂風鼓
大壑吹向西南郊青鞋曳布襪濩落不得驕竭來三十
載食粟同曹交珠璣一萬斛散亂隨塵坳猘猢猻難共居
貪狼如蝟毛蒼蠅變白黑鼠璞矜瓊瑤回首望閭闔雙
星正宮堯而我一何悲偃伏同鷦鷯逝將脫塵網天路

長道遙寄言夸毗子役役徒為勞

余既不上春官燕中遂有傳余病不起者孟弢
方就試輒于院中大慟王次公過澌水為余
言之余聞劇喜命酒索筆賦此寄孟弢

漆園喻桑戶鄭圃稱楊朱豈無王者樂孰與真人居大
鈞播羣象品彙盈寰區偶然值為人稟此七尺軀營營
一生內十九嬰憂虞懽懽愛苦不長勞悴迺有餘冠裳檻
沐猴鍾鼎羅爰居三旬亮已多百年亦奚娛風霜遍項

頷塵垢盈眉鬚齒髮諒非堅金石猶可渝七十二聖君
百千億庸愚參差就黃土轉盼隨丘墟安期信茫昧松
子難覲覲何如一宿覺大夢伸遽廬陶公製哀挽王孫
却衣襦偉哉哲人見我心獲所如死生固有命壽夭詎
足虞戚戚兒女仁母乃曲士拘願言勗明德今古流芳
譽樂哉白雲丘萬代同斯須

夜夢裕卿惟寅覺賦此詩寄懷并呈邦相

康生秉俠烈李子弘風流塵埃困鴻鵠天廡儲驂騑曰

余抱微尚弱冠羈皇州洛中富冠蓋一一俱琳球風塵
片言合把臂為千秋夜談促瑤席春燕開雲樓飛蓬一
朝散抗袂還林丘道路阻且長尺素安可求眼底孰同
聲論心惟喻侯喻侯與康李宿昔伸綢繆雄飛失天路
雌伏來山郵伊余實傾蓋契分逾白頭笑談樂新知感
激懷故儔中宵夢二子宛若平生游慙懃十載別不為
終夜留覺來但長嘆坐失雙吳鉤迺知豪傑人聚散俱
萍浮申章示同好咫尺毋悠悠

始入州謁宣尼廟二首

猗歟大聖人樹建實高厚道苞羲農前業擅堯舜右茫
茫滄海水涓滴靡不受儼若登岱宗絕頂小宇宙於戲
七雄降生民失領袖九流競紛紜百氏互馳驟虛無駕
猶龍因果鑿靈鷲駸尋天網缺疇補坤軸漏龍飛歛淮
甸六合更造就車書煥一統譜系明授受寰區設黌校
家掖仍戶誘詩書被華貊狐兔伏林岫遂令宣尼脉炳
耀絕先後偉哉成周基八百衍潢胄

厥初水精帝肇迹維山東鄉閭表鳬繹胄延龜蒙胡
為姑蔑墟亦有文宣宮時維趙宋末兵戈競華戎渡南
實孔裔大衍三衢宗精靈動世主錫命傳豐隆沿流洎
明代奕葉馳皇封創祠視曲阜貤恩逮無窮清華世世
及岳降齊申崧兩宗峙南北輝赫羅章縫至今太末里
恍忽鄒尼風我來謁遺像三嘆欽遐蹤皇皇六莚軌萬
古侔穹隆

少室山房集卷十三

欽定四庫全書

少室山房集卷十四

明 胡應麟 撰

五言古詩二十首

始出西直門策蹇行堤上四十里暮抵碧雲禪
寺宿顓上人方丈中

塵氛翳京洛客子悲途窮芒鞋出西郊陡覺萬慮空
垂楊四十里長堤跨游龍蹇驢負破帽冷然若乘風

平湖漾明鏡，匝岸紛芙蓉。源窮見大陸，平野羅千松。
環青障冥漠，積翠摩穹窿。峩衆山頂，忽覩金銀宮。
碧雲際天出，氣勢何其雄。欄杆冒白日，棟宇凌秋
空。飛泉繞重砌，漱玉聲玲瓏。浮雲出深澗，映樹明
遙峰。山厨積古雪，石梁卧長虹。始知五濁界，咫尺
蓬萊通。吾將結茅屋，一杖時過從。徘徊不成夢，靜
夜聞微鐘。

早飯罷由碧雲入香山山麓及顛俱有亭諸宮

殿最古是勝國時遺構

仄徑緣藤蘿逶迤入深谷重陰夾磴道彌望皆古木長
松數百年天矯雲際矗飛泉挂峰頂蜿蜒出平陸石門
森隧道孤亭峙山足四天劃然開空洞豁塵目千崖布
黃金萬仞嵌蒼玉梵室緣危杉禪關陰修竹聖果森菩
提曇花吐薝蔔琳宮是何代相傳至元築茲山蹟最古
創始見身毒悠然念人代累劫如轉燭夜分息塵囂重
展法華讀何日歸流沙吾家舊天竺

來青館夜分獨坐題

昏黑登上方遂抵茲軒宿遙峰過疎雨衆山若新沐晚
涼憑闌坐流螢出深竹明月東方生依微隱喬木泠泠
發孤嘯空響答巖谷山僧供伊蒲飽飯禪堂浴微鐘歇
清夜星斗爛可掬終南饒白雲暫此憇幽獨

山左側小徑捫蘿入紅光寺寺僧盡出獨坐贊
公房題十韻壁間

西山四百寺金銀爛蓬島紅光據絕顛迥出千岫杪香

山既窮望石磴上深杳奇峰刺天出勢欲截飛鳥憑高
豁雙眸頓覺宇宙小危龕貯金粟像也億萬恣圍繞禪堂
閒無人黃葉淨於掃曇花吐優鉢香氣達蘿葛悠然悟
塵世解脫何不早會當攜瓢笠一息萬緣了

將登西山絕頂昏黑法華寺廢址小憩

捫蘿上層巔石門嵌空立千嵒吹烈風遺棟梲絕壁古
佛顏蒼藤禪關尚雙闢我行窮登頓假此暫棲息殘僧
一二輩破榻置瓢笠山魈供夜談木客伴朝汲嵐光壞

竈起燐火斷垣出虛牖號寒蟬陰廊走伏翼梵天亦銷
歇塵世幾更易愀然發長嘯感此獨悽惻桑田復滄海
浩浩無終極跼蹐白日暮拂袖下昏黑

凌晨起梯鳥道抵玉巖寺望長安宮闕題

清晨饌伊蒲飽飯捫石壁天風拍兩袖樵路尚昏黑微
月耿崑際殘星墮山脊明霞挂石梁漸起赤城色仰攀
猿鳥巢俯瞰麋鹿窟山椒見臺殿經歲斷人迹危梯霧
半隱古砌雪長積聳身上絕顛河漢僅咫尺震旦隘目

曉宇宙轉呼吸天門九重啓棟宇爛金碧仙姝十萬輩
一一似相識胡為墮人世甘此下方謫勞生四十年營
營若蟻虱長謠歸去來香案玉皇側

西山絕頂縱目誦供奉呼吸通帝座及拾遺馬
能辯皇州二語臨風嘖桑落十數觥沈醉憇
大磐石上昏黑迺下

燕山八萬仞樓臺夾層嶂緬懷窮絕顛攬北大千狀時
維九月暮決策浣塵況蹇驢華嚴宿凌晨策孤杖捫蘿

翠微半亭午思挾續石門排空入猿鳥捷下上兩岸夾
霜楓燃若錦步障憑高宇宙隔陟險身世忘疊磴何岑
崑遙峰漸超曠披襟豁雲霧把袂狎星象皇都但一氣
帝座屹相向九點分齊州一一羅眺望頽然步空虛嗒
爾齊得喪吾將御風遊乘化入無量

翠岩寺在碧雲左障蔽高崖層巘中最為幽絕
余每過必留浹旬

碧雲既鉅麗香山亦宏敞翠岩蔽層巘車馬或希往曰

余負奇癖一一恣探賞羣峰障谷口彌望悉林莽豁
一線入仄徑若指掌危梯屢攀躡喬木時偃仰陰崖伏
空洞陽嶠入宏敞俯窺地欲窮上陟天轉朗樓臺互迴
合金碧時惝恍虛簷織峭巘畫壁森罔兩繩床敗葉積
禪堂壞苔長悠悠石火身兀兀挂世網向暮聊獨吟徘徊發深想

維摩菴又翠岩最幽絕處科頭獨坐萬籟澄寂
殆不復知有人間世因與山靈約異日者畢

婚嫁願攜一鉢安息此中

萬峰人聲絕羅磴恣攀陟樓臺跨深崦盡納衆山色大
地紛金銀遙天挂丹碧禪關面重壑窈窕開丈室科頭
挾書坐如面達摩壁五蘊窮真如六根斷情識將因抱
華嚴住此阿閼國他年號居士說法嗣摩詰

山麓遊卧佛寺寺極宏煥金銀奪目畫廊數百
千尺圖大雄氏顯化顛末備詳僧寮花木彌
靚幽支枕敲卧不覺日晏

琳宮萬山麓勢欲翔遙天金扉熒宏敞玉棟紛鈎連飛
蘿映禪室古木藏玄關奇花及靈果布列森祇園偉哉
化人居傑構凌飛鳶金身丈六強證果示涅槃修廊耀
丹碧粉墨流雲烟始疑張僧繇或詫吳道元窮源溯流
派一一圖真詮天魔亦俛伏外道紛纏綿感此三嘆息
臨風涕如潛猥以無涯智逐茲有盡年何當蠟雙屐西
入清涼山杳然絕人累乘化歸竺乾

出山投華嚴寺夜宿晨起遊呂公洞曩同惟敬

題名老衲炊黃梁作供憶邯鄲枕上事憮然
久之

夜宿華嚴堂晨探呂公洞懸梯噴飛雪流泉伏蟬竦星
流墜幽壑俯視勢若動僧房雲作關禪宇石為棟雷轟
蒼崖裂霧壓翠巒重老衲炊黃梁停午具清供毋疑邯
鄲生至人久無夢

望湖亭亭午小酌空水明媚四山金碧倒浸澄
波中芙蓉菡萏流芳吐艷杳然身在六橋孤

嶼間惜乏兩沙棠艇子載吳娃十雙耳

衆山合長堤空水相映帶平湖漾明鏡秋色照眉黛中
流赤欄起亭亭列車蓋琉璃十萬頃倒浸畫簷外憑虛
望寥廓心賞劇堪快菡萏餘汀洲芙蓉匝灘瀨蛟龍伏
空洞鸛鶴摩遠塞魚遊迴自得鷗行豁無碍美人期不
至豈乏沙棠載吾將返若耶夷光久相待

玄貞觀高峙山顛孤峭突兀望之真中天積翠
由飛梯左右數百級上有石壇宏敞可坐千

人

四山抱若垣蒼翠照林樾中天峙棟宇大地聳雙闕穹
階百級上左右互森列石欄層空立瑤草紛可掇平臺
坐軒敞高棟表巖業振策登翠微朝元叩丹訣玉洞繡
靈篇人迹往來絕暗谷埋寒雲陰崖墜古雪明河漾花
際新月吐木末逝將遺世紛永謝俗士轍

三大士殿

普賢肇峨眉示迹惟西方文殊現五臺臺殿俱清涼倚

與觀世音普陀實吾鄉胡為三大士鼎足偕茲堂吾聞
維摩室方丈羅八荒須彌眇一芥諸佛同行藏况茲三
如來功德侔三光秉心佐迦文並起懸津梁青獅負瓔
珞白象銜珠璫千億昭化身大悲浩難量區區南瞻洲
勺水軍持將楊枝洒甘露涓滴迴枯腸我來重瞻拜感
嘆殊未央善才一童子百十叅慈航我我兜率天不改
帝釋疆胡為滯五濁塵土紛彷徨逝將去人世謝此浮
名縑他時會解脫說法酬空王

大佛寺觀釋迦文佛金像題

我我薊城西飛觀聳百級金身五千丈照耀天北極畫
棟糜丹青雕甍爛朱碧琪花燃如散瑶草紛可拾稱水
清六塵雪山炯四壁廣座陳香燈長廊繪粉墨優鉢梵
筵啓伊蒲僧供出俗染汰欲空淨因了可覓香象來醫
王天龍護帝釋茫然小宇宙一愴大雄力

寺後磊土山為十洞曲屈邃幽余嘗納涼其中

杳若別有天地者

西山實佳麗步步金銀宮四百八十寺窮極土木功或
云竄岩穴未若天南東異哉此叢林製作侔鬼工塊然
一培塿其下皆虛空十洞列左右恍惚蓬萊峰地肺鑿
委羽天窻移張公不假杖藜入無俟乘舟通猗與造化
力播弄指掌中何因邁二女劉阮追遐蹤千秋餌靈藥
綠髮稱仙翁桃花閑流水絕勝九泥封

高涼橋晚憩望新月作

入山路不迷出岫興彌遠平橋帶流水喬木數家晚湖

頭雨初歇沙際塵尚軟彩雲籠大堤新月吐層燼金銀
耀梵刹珠翠競雕輦馥馥紅蕖開靡靡綠萍斂改席臨
菰蒲攜壺就葭莢吳歌起難遏越調和仍緩把臂無求
羊同懷有嵇阮歷落摧雄心憑陵豁醉眼朱顏稍淪謝
白髮且徃苒人生貴適志對景聊引滿

湖上菡萏盛開游人如織抵暮皆入郭余獨往
坐堤畔命小溪撥阮為吳歌

仲秋出湖陰衆芳亦未歇嫋嫋垂楊疎翳翳浮萍合紅

萼遞芳馥綠蒲可攬結遊子飾金羈美人競羅襪笙歌
夾岸起簫鼓臨流發日入息羣囂長謠待新月

歸途過真覺寺五招提突兀雲際與帝城諸宮

闕參差相望寺中車馬旁午蓋漸近國門云

真覺依帝城參差僅十里削成五招提如薄太清起憑
高盡胡越眇迥入箕尾七層際空遙千級去天咫尺青霞
濕衣袂紫霧飄杖履羲和馭金輪拘翼憑玉几俯身視
塵閨局促類螻蟻何當八翼成昏黑猶徙倚

謁觀世音大士禪院在高涼橋側自漢唐下
未嘗稱大士婦人蓋宋元始譌謬王長公近
作大士本紀辨析詳至余復歷據六朝及五
代諸野史小說證驗甚明後人當無詞費矣

吾聞觀世音顯化肇天竺發心救魔難千億現手目功
德如丘山聖愿肯自足遍觀閻浮界衆生苦梵獨噓呵
儼一氣陽春布窮谷凡人發善願一一遂所欲至仁形
影彰明效桴鼓速遂令南瞻洲夫婦蕃孳育我來載瞻

拜頂禮大悲足妙相呈十方天人麗冠服胡為晚近代
姑嫗謬稱祝良哉弇州氏雄辯破流俗中年窘嗣息晚
境冀多福願言普慈施世世事身毒

少室山房集卷十四

欽定四庫全書

少室山房集卷十五

明 胡應麟 撰

五言古詩二十首

古意贈雲間唐子四章

飄飄雲中鴻口銜尺素書有美雲間客宛在天一隅
蘭臺振高躅青驄曳華裾初承百里命栽花爛長衢鳴琴
訟堂上素幙垂清虛冷然念同調發篋貽雙魚贈我金

錯刀投我琅玕珠感子繾綣懷殷勤繫羅襦豈無傾城
色貴此無鹽姝林風冉冉暮歲晏羌何如

哲人代淪謝大雅諒難作世路日凌夷詞場巧枘鑿
睞眄郢都匠戾目陵陽璞何彼金閨彥高誼振頑薄尺書
寄遠道論交慰離索風霜粲華緘颯爽動林薄神劍貽
雷張仙舟佇李郭寥寥九成奏孰振鈞天樂千人失酬
和片語謝雕琢泠泠金石聲三嘆起韶蘧

神交豈在面片諾為生平緬彼古聖賢立談蓋自傾伊

人瑚璉器光輝耀連城
蹙然窮谷中晤言托同聲
朱紘久摧絕為子繞夜鳴
傷哉白日暮俟彼黃河清
金石有時泐浮華安足營
所希大業崇努力追炎京
百世猶比肩千載垂令名
區區九州內胡懼不合并

大江際天流將子一葦航
飛濤如雪山日夜奔錢塘
同心苦離索泪目馳河梁
豈無盈觴醪我友不共嘗
蕪葭被白露林葉何萋黃
朱紘感人懷怨彼離別長
翩翩兩龍劍各逐晨風翔
雄雌一朝合紫氣騰岩廊
許身貴許

心片諾為肝腸寄謝久要客形骸良可忘

贈吳生充二首

季重方七才子華侈八面承家得
齒裔甘守蓬藿賤世途尚豪侈
裘馬互矜炫伊誰振大業往往
讐筆研脩然韋布中嗒爾罷
歆艷遁迹吳山陽索居嚴陵岸
千秋豈不勞樂此琴書翫

一丘伴麋鹿抱膝良堪多何來念
同好負笈攀藤蘿先生久避世
白眼橫庭柯乾坤莽寥廓故交
邈山河玄亭

不盈丈愧汝常經過矯矯侯邑生抱饑習吟哦英詞爛
金石激楚停陽阿黃鵠飛摩天壯齡日蹉跎豈無朱紱
瑟為子迴沈疴才人例百六坎壈終如何

贈黃氏二仲詩二首

括蒼一杯土遂安萬山腹大澤生龍蛇連城孕雙玉俱
操七寸管並驚千里足邂逅錢塘浹翩躚紫陽麓折齒
師仲淹和歌到窮谷眷言申末契悠然味伐木

孟陽誠哲昆季方亦難弟矯矯江夏黃聯飛盛明世談

詩各起予琳瑯遠公社雙鳳鳴雲中二龍語天際回首
華陽宮故交日殞逝晚合蓋自傾居然洞肝肺隋珠豈
不耀愧此荷裳繫歸與葺衡杜白首期勿替

清華館為程生元魯題

大鄣擅幽奇名園負東郭衡茅數十椽軒敞帶長薄林
木何翳然空庭散烏雀清漣媚藻荇綠波映蘅若夾岸
芙蓉披中流芰荷灼翩翻白羽下撥刺紫鱗躍之子吟
逍遙飲泌自斟酌沾沾御元禮疊疊獻康樂問字開揚

亭校書閑劉閣丈人習名理夙諳卧遊樂觀魚失濠梁
騎馬涉京索緇塵染衣袂行行悔入洛何當築土室行
坐此丘壑千秋三逕中求羊未寂寞

汪生惟德工奕而溫然長者行持卷乞言為賦
汪生歛都彥家世本閥閱總角遊巴邛邂逅四仙列龍
肝竊餘剗隨風墮天未攜書客武林精心究圖牒休仁
迨仲甫遺譜恣繙閱藏機玉局中妙思鬼神協一厘據
湖山所當幟必拔九枰欲較王半道祇輸滑紗帽挈隱

囊翹然布衣俠高車長者聚短卷俗流絕半軒風雨聲
廣武戰初合奇謀騁六出廟算窮七伐斜照委綠苔殘
星蔽黃葉逡巡斧柯爛慘淡燭花滅誰云奕小道先生
早跣跋歲月羸二毛悠悠茂弘業當今號國手方呂蔡
頑頑一匡方擅齊方寓清源偏霸汪表越呂蔡季孟間吾評
匪僭躡黃王及朱范少俊互騰踏猗哉盛一時輓近諒
難越就中孰恂恂生也最馴洽澄清叔度侶謹畏伯高
埒爭先戒貪競殿後泯驕伐遇我吳峰巔屢結丈人襪

願言可隻字千秋耀眉睫年來謝筆研推敲廢頰舌參
差宿習萌把袂若中熱為汝聊嘯嘯毫端縱塗抹久矣
忘成虧誰云較優劣枯棋三百六廿載閉空篋冉冉負
局翁騎雲去閭闔

送林貞耀藩叅之嶺南

晨餐悵不御飛龍在河梁駕言奉王命千騎巡東方材
官負旌節組練紛路傍還州震華鼓里閨爛生光偉哉
圖南鵬八翼順風翔把袂即修途行行涉炎荒豈無臨

歧戚執手互徬徨與子異形骸去住安得雙丈夫志萬里六合如帷房勉哉策高足銅柱流芬芳

大荒極東南山川莽迴互四百羅浮峰參差矗雲霧關河信紆鬱人文亦橫驚關關連城壁吹噓競相慕興言適遠塞甘棠夾廣路猗與振大雅始興並風度落帆炎海陬捨筏曹溪渡勾漏饒丹砂行歌白日暮絕域寧久淹金莖湛仙露萬仞飛雲巔帝閤會平步

讀林氏三世集寄貞耀參知天迪員外

我我晉安里王謝惟高門三朝四八座玉立輝乾坤木
天何寥廓金閨信沈淪雲烟爛東序河漢流西崑賡酬
亦遞唱文采如雲屯突兀黃金臺咫尺限帝閭川容卧
輞水山火歌陸渾花晨競彩筆雪夜攜芳尊歡言頌遺
藻典刑儼生存良哉汗青業奕葉垂雲孫

乙未秋邂逅梅生泰符把臂甚暱同觀濤江上
別去未幾則聞生病且殆俄聞生竟不起矣
余再入武林檢敝篋得生手書屢紙不勝山

陽鄰笛之愴爰賦二言投宛溪之上以吊之
梅生宛陵秀負笈來錢塘嘯咏湖山間咳唾馳琳瑯一
朝玉樹亭覩我神飛揚十載胡先生姓名狎詞場慕子
如渴飢戚戚縈中腸龍門屹造天怨彼一水長班荆倏
成故願得升君堂嗟余蹇且拙厯落如桓郎將汝繾綣
懷永夕連匡床觀濤大江溪海若為傍徨眷眷執手言
晨風發河梁將無綺語累念子毛髮黃願言保玉體百
歲遙相望

流光不相待倏忽三歲久鬱鬱上東門春風五楊柳端居
感離索念子成老醜何圖羽翼乖喪我同心友玉樹埋地
中垂楊幾生肘發函見君書洒泪濕蓬牖天運阻百六詞
人厄陽九勁風掃飛藿弱質復何有傷哉大國賦默默如
澠酒遺篇爛金石為汝藏二酉千秋宛溪上不愧朗陵叟

玉樓篇題李能茂遺墨後

有序

東陽李生能茂抱絕人之姿年未四旬而夭
折中道且遺文漫軼有長吉錦囊之憾焉大

塊於才胡亟裁之而亟覆之若是豈上清白
玉樓重構非隴西氏子例不使操觚帝傍耶
余視生忝一日長生謬以匠石見推余亦以
得生里閭快愉甚迺生竟落落地死矣昔長吉
就徵杜紫薇至為奴僕命騷之說生幸獲長
年即亡論驅馳屈宋其力追兩都三唐而不
為王孫之誕漫可前箸汰也生于當世所尸
祝弇州氏外意以信陽吳毫三數公悲易與

而頗時時輓轂歷下生此其持論稍與不佞
左者自餘上下千載大都若合塤箎居常盛
氣欲見所論著垂一家言而疾病未逮今所
存歌詩僅僅數卷則余業序行諸世矣他傳
記雜文既散失而書牘數十百首獨巍然余
巾笥中暇日因為裝潢成軸時展閱之以舒
憤懣秋清木落宴坐齋頭一二友人過從談
藝偶取生遺墨縱觀不覺哀涕淫淫橫集衣

袖河山宇宙纔一俯仰便作陳人悲嘆之懷
庸可復喻輒走筆三十六韻塗抹卷終生誠
有知得無太息於穹壤也

香山兜率宮譙郡遮須國笙飛蛻子晉樓成召長吉造
物誠小兒大塊黷無色傷哉一抔土瘞此連城壁矯矯
東陽生雕龍擅疇昔雄心萬古挫猛氣千夫失蹕厲無
前修精進寡儔匹雙眸狹宇宙今古照瞬息彈丸婆娑
界十指肯浪屈猥余一日長閭閻復咫尺負笈來藤蘿

披襟坐蓬蓽長嘯金華顛大呼石羊窟操觚問真宰慘
淡白虹泣晚叩瑯琊門中郎倒屣出通家孔融後下榻
陳蕃側如澠卜興代生花贈彩筆頻闕慈氏閣屢面初
祖壁善才拜未終慧可髓幾得嗚呼大雄逝金棺拉摩
詰一真返桑扈三號吊秦失白日愁西南浮雲悵東北
伯道無遺孩梁鴻有陋室弱女涕泗橫孤嫠形影隻螭
蛄集荒榛狐兔入叢棘殯宮對棠梨織烏伴於邑何人
奠麥飯有客嘆陳迹高文汲冢殉麗句紫薇緝祭爛流

江河縱橫走都邑隻字迴彭殤寸心炯得失榮華劇臭
腐眼底復何惜嗟余少獲落狂名世爭詘青衫二十載
窮愁仗汝釋一朝斷交臂疇與豁胸臆聞笛時悲酸橫
琴重悽惻粲粲白玉京修文拜新職惟應大鵬輩八表
獨揮斥

寄蘇君禹二首

有序

與君禹別都門倏復二載是秋余寓武林忽
聞君禹仍有燕中之役亟躡屩錢塘握手則

先以黎明出關外矣一水盈盈坐失良晤悵
憾不可言

轉蓬亦有根飄飄隨長風遊子豈無家卒歲歌途窮宛
宛同心人咫尺錢塘東眷言贈芳草軒車若遊龍朝馳
武林驛夕止禦兒宮八翼排金門雙鉤氣如虹而我獨
何為一室長忡忡傷彼四愁咏目送寥天鴻

桂林實奇秀千峰矗雲霄丈夫桑弧志驅馬萬里遙曲
江浣塵垢愚溪滌煩囂伐鼓震五嶺舞千洽三苗昔人

讀書臺突兀迴霞標黃鵠一再舉宇宙參遊遨鴻篇勒
琬琰姓字留荒要皇皇四門闢柱石毘清朝

幔亭篇答黃文學堯衢

有序

莆中黃堯衢以千牘見投疊疊數百言陳義甚
高而過情推挹鄙人幾於昌歎之嗜比讀其所
為諸序傳樂府雜詩奔詣兩都六代間令人應
接靡暇聞生年僅僅逾冠胡以一蹴至斯堯衢
雅欲得予言為序適病中憤憤且茂漪始睹逸

少筆蹤神氣頓爾疲繭爰賦五言古體二十
韻稍致區區僕生平寤寐閩遊三事拜甌寧
滕先生墓及握手武夷君飽啖側生而迄今
且並黃生四矣他日扁舟東下振衣長嘯于
幔亭之顛堯衢得無踴躍和我也

黃生起南服摘藻自弱冠蟬噪薄隋梁龍躍躡秦漢大
言或元封小咏亦貞觀宛宛樂府詞珠璣炫璀璨畸遊
閩海上獨抱延平劍九曲浮清泠九漈吟泮渙飛揚大

江揖躑躅廣武戰何哉九合勛桓文謬推贊前茅受旗
鼓中權屬壇坫穆穆清風頌寄我劇三嘆嗚呼哲人頽
往事涕如霰瑯琊玄草絕豐社白榆散陽春悵誰和長
夜邈難旦灼灼傾城姝昭陽擅飛燕凌雲羽翮就澤霧
文彩變大鵬遇希有八極眇一盼將無笑鸞鳩會有嘲
斥鷃俗士迷前籌達人炳遐算奇峰三十六一一造天
半為報武夷君廣張幔亭燕

夜燈同永叔話舊仲子弼年十四於座中戲咏

白石榴有霜寒秋色淨明月挂枝頭之句余
嘉其風格朗朗賦此勗之

石梁駕丹壑赤城橫紫霄天台八萬丈的皪懸霞標司
空毓靈秀龍躍隨神堯華名走絕域茂實騰中朝鬱鬱
庭階樹三珠粲同胞青錢捷唾手俯拾如承蜩高陽失
才彥頽上慙時髦文章聚花萼溥海誇賢豪緬余識季
公把臂成久要古心出墳索逸韻馳風騷矯矯八尺軀
恥偕兒女曹曾吞夢澤水氣折洪河濤雄飛邈廣漢雌

伏懷窮交皇皇潞河溪十口勤維梢空同倚長鋏函谷
遺綈袍吹噓及朽榦攬挈當前茅狂歌復痛飲浩蕩窮
深宵呼盧墮明月角奕流神颺情投儼膠漆契合鈞咸
韶酒酣見仲子燧若英瓊瑤翩翩慕周孔卓犖譚伊臯
孤芳滌塵膩五字驅炎囂靈光詫授簡鸚鵡憐揮毫揚
收劣加歲子安正垂髻伊余越四十蘭玉殊凋蕭對此
重嘆息中腸熱如焦于門一何盛咄咄鍾靈苗丹山詎
凡翮渥水真奇毛勉哉事大業歲月如風飄無窮有令

聞不朽寧金貂下幃第發憤惜陰競蓬茅六經鼓元氣
百氏羅秋毫餘皇破巨浪繁弱聯雙鵬祖孫及子父奕
葉馳華鑣回首天台色東南正寥寥惟應太原望世世
爭岑堯

少室山房集卷十五

欽定四庫全書

少室山房集卷十六

明 胡應麟 撰

五言古詩一十八首

戒裝武林別施蔡二生

施生赤城彥蔡子黃岩英
吞吐石梁霞各著詞苑聲
相逢武林道握手蓋自傾
交孔競持刺識韓互班荆
廿載龍門懷一旦希合并
空山咏伐木求友何嚶嚶
緬余朽

且拙蚓竅鳴春鶯翩翩兩國士立談四座驚擊筑邀漸
離脫劍遺荆卿河橋驟脂轄立馬言長行行去吳會
望望投幽并屋梁夢顏色落月懸高旌念彼新知樂日
夜肝腸撓

翠筠軒十六韻為姑蔑柴生起用題

仲蔚耽蓬蒿陶公藝松菊何如三徑中翛然萬竿綠掩
映王猷居蔽虧張廌屋夾砌澄清漣捎簷洒飛瀑琤琮
風乍鳴蔥蒨雨新沐秀色分渭川清陰散淇澳天寒白

鶴下日暮文鵷宿主人挾胡床閒把道書讀曳杖時科
頭銜杯或坦腹裴李咸披襟嵇阮互遊目高秋橫笛音
五夜洞簫曲嗟余懼世網羨爾軼塵俗佳人隔翠袖千
里夢空谷將因挈枕簟晚歲共幽獨

題蔡稚含適適軒二首

達人委元化哲士戒迷塗一枝遂鷦鷯九萬匪所圖樂
志追仲長潛耀希王符軒窓僅容膝結構臨菰蒲座右
橫清琴相對酒一壺客來但留酌往往高陽徒俯仰宇

宙中倏若黃公壚秋色下前山我醉君但扶不見南郭
生嗒然忘故吾

憶昔金馬門執戟趨銅龍雄飛奮六翮天矯隨天風一
朝事勢異漂轉如征蓬人生貴適意大業寧三公開軒
赤城畔丹霞照簾櫳圖書不盈丈有若蓬萊宮神遊八
極表目送雙飛鴻陋彼征西貴柴棘盈胸中太虛為我
宅何事悲途窮

再送惟德使君挂冠還景陵

士有曠世志宏覽隘八荒
烜如岐山鳳千仞常孤翔
矯矯徐使君束髮趨明光
高臺騁驥足絕棧逾羊腸
淮圻縛猖獗歟旬寧勛膚功
勒琬琰大業懸旂常洪流割
淮泗再起紓懷襄玄圭帝三
錫薦牘交岩廊皇皇神武
門振步皆康莊涼飈倏以厲
悲彼芰荷裳一朝返初服
挂冠出徐方父老涕泗橫
雙雙盈路傍勇退乘急流
永謝浮名纒咄咄邯鄲翁
朝餐熟黃粱大千等夢幻
綠鬢俄秋霜逝將息埃壒
冲漠朝羲皇築宮寄層巘
結宇臨

崇崗曳杖泰山顛挂瓢潁水陽五湖笑鴟夷六合追雲
將我友值明發送子臨河梁眷眷脫屣懷大覺迴滄桑
高風凜百代感嘆徒彷徨偉哉扶搖翮宇宙呈圓方他
時挾雞犬拔宅升微茫金莖爛雲際甘露流天閭願言
洒病骨餘漚沾枯腸

懷姑蔑柴生起用時生將謁余燕中

秦嘉滯府胥常建窘邑尉良哉達人言高才鮮貴位矯
矯姑蔑墟柴生出其類青雲走牛馬白日侶蚊蚋案牘

勞形神刀筆記功罪八議權親疎五刑覈情偽寧懷張
杜刻敢冀蕭曹會論交企蘭荃投誠密蕭艾麗句蒐梁
陳遐思闔晉魏白雪流輕揚丹霞獻明媚沾沾太玄草
捧誦若金匱嗟余素寡合念汝欲捐珮南山歌未闕北
陸盟忍背時生將北上謁余燕中勝流實嶽崎名士本憔悴浮蹤
自昔然大業豈終累不見漁陽搨正平興彌銳至今鸚
鵡篇永拔詞賦萃

輓宋西寧忠父

賢士悲龍蛇才人困百六嗟嗟宋子侯宛爾大夫玉天
矯珊瑚枝光輝奪魚目冲虛本天性濡下甘自牧執轡
道愈尊結襪躬豈辱門庭聚四海賓客互追逐飛觴不
問主洗盞輒更僕悲秋坐五夜避暑卧三伏懼言詎知
疲豪舉動驚俗才高世爭妬名成帝未錄上谷無爰書
中山有謗牘一肯遺干城寸朽棄良木長康笑黠癡桓
倫嘆鞦韆萬鍾亦何加千秋會相屬煌煌白玉樓忽赴
上清錄令威去遼陽莫邪閉豐獄虛堂妖鵬鳴荒塚孽

狐伏河山怨離索宇宙恨幽獨白楊翳泉臺青藜熄天
祿寥寥郢中賦淒愴不堪讀

方母孀節詩為厥子伯苓題

烺烺新都媛修蛾粲明璫十三字君室十五登君堂良
辰一以醺中厨奉姑嫜眷言拂巾席皓首偕匡牀風波
起中路庭樹飛秋霜青銅擲粧閣碎裂羅衣裳剖心慰
夫壻截髮藏筐箱空閨撫弱息血淚橫枯腸松關白日
暮永夜啼寒螢抱影三十年哀哀稱未亡緬懷勵高節

沈筆題篇章他時繼黃鵠萬古明天常

寶劍篇

以下古意三首
贈鄧子遠遊

司空兩龍劍紫氣何煌煌雄雌閉石匣萬古垂精光憶
昔初鑄時乃在越溪傍誰能為此技莫耶與干將百鍊
就鐔鏐千鍊成鋒芒風波起長路出處俄參商一飛九
天外八翼遊岩廊一沈九地中悲鳴和寒螿時命固大
謬分違亦其常與子匪一身爾我安得雙

天馬咏

天馬汗血駒駝出湟中一鳴伯樂顧再鳴冀北空何
來市駿者相值華陽宮黃金百萬鎰玉勒馳青驄飛行
厯九陌疇不憐追風悲哉照夜足躑躅太行東豈無烈
士腸歲年倏成翁徒令廝養卒執策嗤龍鍾

豫章行

亭亭孤生木厥惟豫章材蒼龍蟄岩穴鱗甲纏莓苔一
朝魯班氏伐至秦王臺中天懸高棟有若登蓬萊萬間
礙星月九級披雲霓金銀互文飾朽櫟庸堪偕寧知大

椿樹廣莫甘塵埋春秋八千計逍遙卧無懷

二難雙美詩為大叅張公賦

有序載別卷中

猗歟三百篇張仲顓孝友四姓雄金閭吳趨實材敷森
森五丹桂揚芳贊皇園惟時疫癘侵高堂阨陽九饗殮
滯床第湯藥盈鬲卣諸昆競扶侍昏旦遽奔走叔也尤
傍徨蟣虱生帶紐露禱臨中達恍惚心語口母算倘可
延兒躬曷遑有昊天若傾聽冥冥肯其首沈疴遽霍然
哀札起蒲柳一死全吾心庸恤近與久飛騰屬少公萬

卷窮二酉大孝昭顯揚龍章煥星斗元方操實奇李方
過寧偶我我二難列異代同不朽

二難既表吳雙美尤擅越緬懷神仙尉微官寄太末東
帶見督郵甘等絳濯列去思二十載高風柳下頡積慶
流參知振代覩人傑詩禮聞家庭頌賦起岩穴讀書直
中秘五車恣漁獵升沈遞敬厯顯晦互更涉直聲聳廟
堂上考奏藩臬大旆翔三衢棠陰半姑蔑遺民泣往躅
故老頌休烈廳事垂雙松步武儼對越熙朝述盛事名

宦祠世業至行通神明清芬播齒舌弟昆洎父子後先
迥光絕令譽收一門千古垂閭閥

飯惟寅白雪山房話舊

錯落雙龍劍寒芒凌素秋紫氣燭豐城射彼斗與牛一
朝遇司空發函佩吳鉤風霜劃相妬坐拆蒼精虬雄飛
渺北極雌伏還南州山川莽寥廓哀鳴互相求霜華粲
中夜索處聲啁啾何意長安陌相逢重夷猶一見喜且
驚倒屣羅珍饈高堂把桑落歷數平生遊彈指三十年

震旦若浮漚夙昔紅顏子參差俱白頭
升沈間存沒萬感盈荒丘
緬邈同心人中原聚名流
瑯琊失麟鳳嶺表埋黎歐
突兀魯靈光寥寥見君侯
頭風汝旋愈肺病余寧憂
惟應委元化百齡暮優游
安期下玉舄赤松駐瀛洲
仙飈載羽翼八極朝宸旒

惟寅以書貺馳使潞河適媵人偶舉一子走筆
賦答

驚塵蕩白日羸馬馳郊墟
悵彼同心人緬邈百里餘
舉

頭雲中翮有鳥銜尺書粲粲瑤華札開緘照衡廬慰我
加餐飯問我何方居十口寄他鄉晨餐食無魚芒鞋後
款段誰為供高車感此長太息臨風重踟躕骭膝宇宙
間畸遊抱琴書朱門盛先達落落窮相如夙昔逢君侯
青驄曳華裾情親四十載膠漆垂桑榆纏綿國士念涸
轍頻吹噓豈忘木桃報再拜慚庭除中閨夜得雄旅抱
偶一舒眷言骨肉友卧起同徐于持此答芳訊聊用當
璫珞頽然定一笑為我掀穉瑜

題瞿令人冊為茂才紹曾

有序

令人瞿氏丁生紹曾母也笄歲有家夫遘痼疾天心夙夜扶顛持危垂四十年終始惟一今紹曾長補邑弟子員矣念令人劬勞逆境迥絕他為人婦者持冊介從叔父文統謁余武林曰惟先生寵施一言即華衮母氏亡異余既高令人之誼且愍紹曾之惓惓請也援筆慷慨為賦五言古二百餘言

婦惟丁生母卓行超人寰筭歲適名門婉若蕙與蘭結
襦詎云久災氛岌相纏良人邁奇疾百體紛摧殘心神
忽眩暝手足時顛連歡娛擲中道疇不虞紅顏母也執
高節涕泗如流泉呼天誓同穴肯析雙飛翰一身委床
第藥物長周旋肝腸絕怨懟面目忘媿妍仰事頭白姑
頻鞠黃口男家徒四壁立辟廬夜燈前拮据度荒饑永
晝懷饑寒彼蒼鑒明德繞膝森鵷鷺矯矯汗血駒勵志
遊天閑劬勞念母氏賦咏蒐名賢我聞載嘆息踴躍操

如椽偷生信為易蹈死亮非難厄哉斯人過畢世罹憂
患貞心既不毀淑問仍終完夫存子亦樹晚節聊蟬聯
寧知處困懷荼毒窮當年凜凜鐵石腸興彼懦與頑裁
詩頌令哲史筆千秋傳

謁關忠義廟作

中原邁百六漢鼎分三雄矯矯忠義侯挺身出蒲東草
茅識先主仗劍扶真龍間關表呂營百折明丹衷飛揚
白馬戰銳氣噓長虹立取上將頭萬夫摧折衝解圍謝

曹氏絕婚詬吳儂巨浪滄七軍襄樊列勝幢禁俘德亦
虜大江血流紅威聲赫華夏皦日懸晴空陸渾亘許洛
壺漿若雲從詎意肘腋間包藏劇羣兇蚩蚩衆孤蜮發
姦維遜蒙輕舟襲南郡九仞墮成功麥城困孤旅臨殂
徽元戎詎云彼蒼酷況乃炎精終昭昭玉泉宇肱蠻倖
層穹河山峙壯節尸祝盈寰中姓名走婦孺位號歆兒
童伊余肅遺像颯爽來英風嗟彼操與權死生細螟螣
累累兩國賊紫陽筆何公遐哉九朝祀元運偕無窮剛

腸儼對越三嘆欽前蹤

觀察林公嘗感異夢於忠義我以左轄趙公之輯
侯志也索題其像爰繼此篇

漢統遘桓靈縣宇互分裂卓布首傾危操權晚猖獗矯
矯中山冑風塵締材傑猛氣雄萬鈞危途厯九折下邳
阬羊腸官渡奮鼠穴生平為劉念俄頃報曹節大呼梟
敵元干將路明滅全師鎮荆楚威名愈騰掣益起標盧
前漢升恥灌列長驅出漢沔舟航泰山壓禁俘若羊豕

德磔等蠓蟻先聲震華夏壺簾道填咽高光四百基克
復儼眉睫漢賊肝膽驚吳歆夢魂攝外交託姻婭內忌
迥秦越陰謀劇魍魎狙伺銳饕餮艘艘藏戈矛烽屯虜
間謀侯也天日哀迄墮羣小策崢嶸兩岩郡望風授克
孽遂令蓋世功彈指恨

闕

少室山房集卷十六